

欽
定
全
唐
文

欽定全唐文卷六百七十八目錄

白居易 二十三

蘇州重元寺法華院石壁經碑文

有唐善人墓碑銘

并序

西京興善寺傳法堂碑銘

并序

唐故湖州長城縣令贈戶部侍郎博陵崔府君神

道碑銘

并序

淮南節度使檢校尚書右僕射趙郡李公家廟碑

銘

并序

故饒州刺史吳府君神道碑銘

并序

唐故通議大夫和州刺史吳郡張公神道碑銘

并

序

唐贈尚書工部侍郎吳郡張公神道碑銘

并序

大唐泗洲開元寺臨壇律德徐泗濠三州僧正明

遠大師塔碑銘

并序

唐東都奉國寺禪德大師照公塔銘

并序

唐撫州景雲寺故律大德上宏和尚石塔碑銘

并

序

唐江州興果寺律大德湊公塔碣銘

并序

欽定全唐文卷六百七十八

白居易 二十三

蘓州重元寺法華院石壁經碑文

碑在石壁東次石壁在廣德法華院西南隅院在重元寺西若干步寺在蘇州城北若干里以華言唐文譯刻釋氏經典自經品衆佛號以降字加金焉夫開士悟入諸佛知見以了義度無邊以圓教垂無窮莫尊於妙法蓮華經凡六萬九千五百五言證無生忍造不二門住不可思議解脫莫極於維摩詰經凡二萬七千九十二言攝四生九類

入無餘涅槃實無得度者莫先於金剛般若波羅蜜經凡
九千二百八十七言禳罪集福淨一切惡道莫急於佛頂
尊勝陀羅尼經凡三千二十言應念順願願生極樂土莫
疾於阿彌陀經凡一千八百言用正見觀真相莫出於觀
音普賢菩薩法行經凡六千九百九十言詮自性認本覺
莫深於實相法蜜經凡三千一百五言空法塵依佛智莫
過於般若波羅蜜多心經凡二百五十八言是八種經具
十二部合一十一萬六千八百五十七言三乘之要旨萬
佛之秘藏盡矣是石壁積四重高三尋長十有五丈厚尺

有咫尺有石蓮敷覆其上下有石神固護其前後火水不能燒漂風日不能搖消所謂施無上法盡未來際者也唐長慶二年冬作太和三年春成律德沙門清晃矢厥謀清海繼厥志門弟子南容成之道則終之寺僧契元捨藝而書之郡守居易施詞而讚之讚曰

佛涅槃後世界空虛惟是經典與衆生俱設復有人書貝葉上藏檀龕中非堅非久如蠟印空假使有人刺血爲墨剝膚爲紙即壞即滅如筆畫水噫畫水不若文石印蠟不若字金其功不朽其義甚深故吾謂石經功德契如來付

囑之心

有唐善人墓碑銘

并序

唐有善人曰李公公名建字杓直隴西人魏將軍申公發公十五代祖也周柱國陽平公遠六代祖也綏州刺史明高祖也太子中允進德曾祖也綿州昌明令珍玉大父也雅州別駕贈禮部尚書震考也贈博陵郡太君崔氏妣也陳許節度禮部尚書遜兄也渭源縣君房氏妻也容管招討使濟外舅也長慶元年二月二十三日夜無疾即世於長安修行里第是歲五月二十五日歸祔於鳳翔某縣某

鄉某原之先塋春秋五十八有二女五男曰納朴恪慤碩
公官歷校書郎左拾遺詹府司直殿中侍御史比部兵部
吏部員外郎兵部吏部郎中京兆少尹澧州刺史太常少
卿禮部刑部侍郎工部尚書職歷容州招討判官翰林學
士鄜州防禦副使轉運判官知制誥吏部選事階中大夫
勲上柱國爵隴西縣開國男有史官起居郎渤海高錢作
行狀翰林學士中書舍人河南元稹作墓誌有尚書主客
郎中知制誥太原白居易作墓碑大署其碑曰善人墓善
人者何公幼孤孝養太君太君老疾常曰痿子勸吾食吾

輒飽勸吾藥吾意其疾瘳痿子公小字也及長居荊州石
首縣其居數百家凡爭鬪稍稍就公決公隨而評之寢及
鄉人不詣府縣皆相率曰往問李君公養有餘力讀書屬
文業成與兄遜起應進士俱中第爲校書時以文行聞故
德宗皇帝擢居翰林翰林時以視草不詭隨退官詹府詹
府時以貞恬自處不出戶輒逾月鄜帥路恕高之拜請爲
副在鄜時有非類者至以病去爲御史時上任有過其行
事者作謬官詩以諷爲吏部郎時調文學科暨吏課高者
得無停年又省成勞急成狀限繇是吏史輩無緣爲姦迄

今選部用其法知制誥時筆削間有以自是不屈者因請
告改少尹少尹時與大議歲減府稅錢十三萬在澧時不
鞭人不名吏居歲餘人人自化在禮部時由文取士不聽
譽不信毀公爲人質良寬大體與用綽然有餘裕爲政廉
平易簡不求赫赫名與人交外淡中堅接士多可而有別
稱賢薦能未嘗倦好議論而無口過遠邪諛而不忤物其
居家菲衣食厚賓客敬兄嫂禮妻子愛甥姪初先太君好
善喜佛書不食肉公不忍違其志亦終身蔬食自八九歲
時始諷詩書日三百言諷畢盡得其義善理王氏易左氏

金史卷之二十一
春秋前後著文凡一

三一作

百五十二首皆理義撮要詞無

枝葉其卓然者有詹事府司直比部員外郎廳記請雙日
坐疏與梁肅書上宰相論選事狀秉筆者許之薨之日不
識者惜識者嘆交遊出涕執友慟哭夫如是其善人乎傳
曰善人國之紀也語曰善人吾不得而見之矣噫善人之
稱難乎哉獨加於公無愧焉銘曰

古者墓有表表有云顯其行省其文故季札死仲尼表其
墓曰君子今吾喪李君署其碑曰善人嗚呼李君有知乎
無知乎君之名與此石俱

曰凡夫無明二乘執著離此二病是名貞修貞

一作真修者

不得動不得忘動即近執著忘即落無明其心要云爾師之徒殆千餘達者三十九人其入室受道者有義崇有圓鏡以先師常辱與予言知予嘗醞醕嗅薝蔔者有日矣師既歿後予出守南賓郡遠託譔述迨今而成嗚呼斯文豈直起師教慰門弟子心哉抑且志吾受然燈記記靈山會於將來世故其文不避繁銘曰

佛以一印付迦葉至師五十有九葉故名師堂爲傳法

唐故湖州長城縣令贈戶部侍郎博陵崔府君神

道碑銘

并序

公諱孚字某古太嶽允也今博陵人也唐虞之際因生爲
姜姓暨周封齊分類曰崔氏長源遠派大族清門珪組賢
俊準繩濟美斯崔氏所以綿千祀而甲百族也隋散騎常
侍諱洽公六代祖也唐冀州武強令諱紹曾祖也監察御
史諱預王父也常州江陰令育皇考也公幼以門蔭子補
太廟齋郎初調授汝州葉縣尉再調改宋州單父尉時天
寶末盜起燕薊毒流梁宋屠城殺吏如火燎原單父之民
將墜塗炭公感激奮發仗順興兵挫敗賊徒保全鄉縣奉

勇之徒歸之如雲方欲糾合貔虎毆誅虵豕京觀羣盜金湯一方本道節度使奇之將議上聞會有同事者爭功陰相傾奪公超然脫屣遂以族行東游江淮安時俟命屬吳王出閣領鎮求才撫人常聞公名試以吏事遂表請爲宋城尉事舉移假連水令賞緋魚袋縣政修轉常州錄事參軍糾察課賦浙東採訪使聞之奏授越州餘姚令吏畏人悅歲未滿浙西採訪使知之奏改湖州長城令長城之理又加於前二邑焉政成秩滿解印罷去優游自得獨善其身興元元年疾歿於宋太和五年遷葬於洛享年若干詔

贈尚書戶部侍郎夫人隴西李氏追封岐國夫人皆從子
貴也公爲人儀表魁梧氣概倜儻負不羈之才慕非常之
功始發軔於單父志立而功不就終稅駕於長城道行而
位不達善慶所積實生司空司空諱宏禮公之幼子也以
學發身以文飾吏以幹蠱克家以忠壯許國典十郡領二
鎮再釐東土追命上公雖天與之才國與之位亦由公義
方之訓輔而成焉大丈夫貯蓄材術樹置功利鎡鋌富貴
焯燿邦家不當其身而得於後父析子荷相去幾何嗚呼
崔公何不足之有按國典官五品以上墓廟得立碑又案

喪葬令凡諸贈官得同正官之制其孫彥防彥佐等奉父
命述祖德揭石於墓勒銘於碑銘曰

天無全功賢無全福既享天爵難兼世祿矯矯崔公道積
厥躬大志長畧卷於懷中黃綬遏寇思奮奇功銅印字人
躬行古風才高位下步濶塗窮竟戢羽翮不展心曾天道
有知善積慶鍾昭哉報施其在司空

淮南節度使檢校尚書右僕射趙郡李公家廟碑

銘并序

王建侯侯建廟廟有器器有銘所以論譔先德明著後代

或書於鼎或文於碑古今之通制也維開成某年某月某
日宣武軍節度使檢校尚書右僕射汴州刺史上柱國賜
紫金魚袋趙郡李公齋沐祗懔拜章上言請立先廟以奉
常祀於是得請於天子承式於有司是歲某月某日經始
於東都明年某月某日有事於新廟外盡其物內盡其志
三獻百順神格禮成其友居易以李氏宗祖世家名爵與
僕射志行官業書於麗牲之碑謹按家畧九代祖善權後
魏譙郡守八代祖延觀徐梁二州刺史七代祖續某郡太
守六代祖顯達隋潁州刺史五代祖遷皇朝宜穀二州別

駕贈德州刺史高祖孝卿右散騎常侍贈鄧州刺史曾祖
府君諱敬元總章儀鳳間厯吏部尚書同中書門下三品
中書令宏文館大學士監修國史封趙國公諡曰文憲才
智職業載在國史今祭於第一室以妣薊國夫人范陽盧
氏配焉王父府君諱守一屬世難家徙不求聞達避榮樂
道與時浮沉終成都府郫縣令今祭於第二室以妣榮陽
夫人鄭氏配焉先考府君諱晤厯金壇烏程晉陵三縣令
府君爲人篤於家行飾以吏事動有常度居無惰容所莅
之邑有善政辭滿之日多遺愛不登貴仕其命矣夫今祭

於第三室以先妣上谷夫人范陽盧氏配焉府君累贈至
尚書右僕射夫人累贈至上谷郡太夫人前後凡三追命
六告身渥澤疊洽自葉流根從子貴也郢縣暨晉陵府君
咸善積於躬道屈於位儲祉流慶而僕射生焉僕射名紳
字公垂六歲丁晉陵府君憂孺慕號踊如成人禮九歲終
制孝養上谷太夫人年雖幼承順無違家雖貧甘旨無闕
侍親之疾冠帶不解者三載餘可知也執親之喪水漿不
入口者五日餘可知也先是祖妣考妣晉陵府君前娶夫
人裴氏無子早卒洎叔父兄妹之殯咸未歸柩各處一方

公在斬衰中親護九喪匍匐萬里及其一作期襄事禮無闕

違至誠感神有靈烏瑞芝之應事動鄉里名聞公卿言孝友者以爲表率憲宗嗣統三年李錡盜據京口公居無錫會擢第東歸錡聞公名署職引用初詢以謀畫結舌不對次強以章檄絕筆不書誘之以厚利不從迫之以淫刑不動將戮辱者數四就幽囚者七旬誠貫神明有死無二言名節者以爲準程朝廷嘉之拜右拾遺歲餘穆宗知公忠孝文行召入翰林特授司封員外郎知制誥遷中書舍人承顏造膝知無不言獻替啟沃如石投水俄拜御史中丞

戶部侍郎既而望屬台衡朝當晏駕時移世變遂出掾高
要佐潯陽旋爲滁壽二州刺史大凡公之爲政也應用無
方所居必化卧理二郡以去害爲先故有盜奔獸依之感
廉察浙右以分憂爲功故有卹鄰活殍之惠尹正河洛以
革弊爲急故有摘姦抉蠹之威文宗知公全才以汴難理
乃授鉞鉞俾鎮綏之初宣武師人驕強狠悍狃亂徼利積
習生常公旣下車盡知情僞刑賞信惠合以爲用一年而
下懲勸二年而下服畏三年而下恥格肅然丕變薰然太
和撫之五年人俗歸厚至於捍大患禦大災却飛蝗遏暴

水致歲於豐稔免人於墊溺噫微公之力汴之民其爲殫
乎其爲魚乎殊績尤課不可具舉天下征鎮淮海爲大非
公作帥不足以長束諸侯制加銀青光祿大夫揚州長史
淮南諸道節度觀察等使餘如故詔下之日出次於外軍
門不擊柝里巷無犬吠從容五日按節而東百姓三軍挈
壺漿捧簞醪遮道攀餞者動以萬輩皆嗚咽流涕如嬰兒
之別慈母焉噫若非襦袴之惠及其幼雞豚之養及其老
又推赤心置人腹中者則安能化暴戾之俗一至於此乎
西人泣送東人歌迎梁楚千里風變化移膏雨景星所至

蒙福於時開成會昌之際上方致理公未登庸熙熙蒼生
環望而已盛矣哉大丈夫生於世也以忠貞奉乎君以義
利惠乎人以黻冕貴乎身以宗廟顯乎親以孝敬交乎神
宜其荷百祿輔一德爲有唐之宗臣者歟君子謂李氏之
廟也休哉公之祭也順哉然曰有孫如此有子如此可謂
孝矣故其碑銘曰

祭祀從貴爵土有秩諸侯之廟一宮三室皇皇西室皇祖
中書孝孫追遠昭穆有初顯顯中室王父郛令順孫祇享
盡慤盡敬肅肅東室先考晉陵嗣子奉薦孝思蒸蒸嗣子

其誰僕射公垂公垂翼翼齋嚴諒直爲子爲臣有典有則
載膺休命載踐右職以孝肥家以忠肥國乃授侯伯肅鉞
旂戟乃饗祖禰牲牢黍稷家聲振耀國典褒飾六命徽章
三世血食光大遺訓顯揚先德子孫承之垂裕無極

故饒州刺史吳府君神道碑銘

并序

汨市朝溺妻子非達也困山林擯血屬亦非達也若有人
與羣動處一代間彼爲彼我爲我不自潔不自污不巢許
不伊呂水其心雲其身浮沈消息無往而不自得者非達
人乎吾友吳君從事於斯矣君諱丹字真存太子通事舍

人覽之曾孫睦州司馬庶之孫太子宮門郎贈工部尚書

銓

一作詮

之長子以進士第入官歷正字協律郎大理評事

監察殿中侍御史太子舍人水部庫部員外郎都官駕部

郎中諫議大夫大理少卿饒州刺史職歷義成軍節度推

官浙西道節度判官潼關防禦判官鎮州宣慰副使

一作司

匭函使階至中大夫勲至上柱國讀書數千卷著文數萬

言寶歷元年六月某日薨於饒州官次其年十一月某日

葬於常州晉陵縣仁和鄉北原從遺志也君生四五歲弄

泥沙時所作戲輒象道家法事八九歲弄筆硯時所出言

輒類詩家篇章不自知其然蓋宿習儒元之業明矣弱冠
喜道書奉真籙每專氣入靜不粒食者累歲顙氣充而丹
田澤飄然有出世心既壯在家爲長屬有三幼弟八稚姪
嗷嗷慄慄不忍見其饑寒慨然有干祿意乃曰肥遁不可
以立訓吾將業儒以馳名名競不可以恬神吾將體元以
育德凍餒不可以安道吾將強學以徇祿祿位不可以多
取吾將知足而守中繇是去江湖來京師求名得名求祿
得祿身榮家給之外無長物無越思素琴在左黃庭在右
澹乎自處與太和始終履仕途二十七年享壽命八十二

歲無室家累無子孫憂屈伸寵辱委順而已未嘗一日戚
戚其心至於歸全反真故予所謂達人之徒歟信矣仲弟
湖州長史某以予辱與其兄遊旣爲同門生又爲同舍郎
周知初終託爲碑記噫先生之道吾能引古以明之銘曰
漢中大夫東方曼倩夏侯湛高之作廟貌讚唐中大夫真
存先生白樂天知之作神道銘嗚呼二大夫異代而同途
其皆達者乎

唐故通議大夫和州刺史吳郡張公神道碑銘

并

序

張之爲著姓尚矣自漢太傅良侍中肱晉司空華丞相嘉
以降勲賢軒冕歷代不乏肱避地渡江始居於吳故其子
孫稱吳郡人嘉以孝悌聞於郡故其所居號孝張里嘉之
曾孫裕在宋爲司徒即公五代祖也司徒之孫儔在隋爲
吳郡都督即公會王父也台州臨海令諱鵬即公之大父
也袁州司馬諱孝績即公皇考也或以人物著或以閥閱
稱迄今爲江南右族公諱擇字無擇未冠丁袁州府君憂
廬於墓晝號而夜泣者三年矣有靈芝醴泉出焉旣冠好
學能屬文從鄉試登明經第應制舉中精通經史科補宏

文館校書郎調左金吾錄事換杭州錄事參軍在杭州前後詰僞制補吏者三十八人駁假年侍老者二十人舉而正之人服其明會劉幽求來爲刺史舉課上聞詔授絳州錄事參軍絳之郡丞有主壻者怙寵侮法豪奪人利公數其罪露章奏之章下丞相府丞相姚元之奇之致書褒美尋改太原府功曹參軍給事中張昶爲江淮安撫使表公正直奏署郡從事吏部尚書陸象先爲河東按察使狀公清白奏授懷州獲嘉令在獲嘉以不茹柔得人心以不吐剛得罪繇是左遷鄂州司馬移深州司馬轉號州長史時

上方思理詔求二千石之良者時宰以公塞詔擢拜和州刺史公之在郡奉詔條卹人隱而已不知其他無何水潦害農公請蠲穀籍之損者什七八時李知柔爲本道採訪使素不快公之明直密疏誣奏以附下爲名遂貶蘇州別駕老幼攀泣而遮道者數百人信宿方得去移曹州別駕歲餘謝病歸老於家天寶十三載正月二十一日終於東都利仁里私第其年二月十二日葬於河南府伊闕縣中李原享年八十三噫公生天地間八十有三年可謂壽矣其間當明皇帝馭天下四十有五年可謂時矣有其才得

其壽逢其時然職不過陪臣秩僅至郡守凡所貯蓄鬱而不舒嗚呼其命也夫公之文學常爲賀知章賈彥璿許之公之諒直常爲李邕張庭珪稱之公之政事又爲劉姚張陸推之夫以八君子之力援之而不足以一知柔之力排之而有餘厄窮不振以至沒齒嗚呼其命也夫古人云道不虛行又云其後必有達者故公之子大理評事誠以節行聞於時公之孫戶部侍郎平叔以才位光於國報施之道信昭昭矣不在其身則在子孫相去幾何哉長慶二年某月某日平叔奉祖德揭而碑之居易據家狀序而銘之

其詞曰

有木有木碩大而長破爲桷杙不作棟梁有驥有驥規行
矩步辱在短轅不駕大輅嗚呼噫嘻公亦如之將時不我
遇而我不遇時勿謂已矣天錫多祉旣賢其子以濟其美
又才其孫以大其門苟無先德孰啟後昆

唐贈尚書工部侍郎吳郡張公神道碑銘

并序

有唐嶺南觀察推官試大理評事吳郡張公大厯三年十
一月八日終於伊川別墅五年八月七日葬於伊闕縣中
李原春秋五十五元和十三年詔贈主客員外郎明年贈

太常少卿又明年贈尚書工部侍郎夫人吳郡陸氏貞元

二年

一作三年

某月某日終於其所春秋六十六追封嘉興縣

太君又封吳郡太夫人嗣子通議大夫守尚書戶部侍郎

判度支上柱國賜紫金魚袋平叔以長慶二年某月某日

立神道碑太原白居易文其碑云公諱誠

一作識

字老萊吳

郡人父諱無擇和州刺史祖諱孝績袁州司馬由高曾而

上世德世祿載在和州府君碑內此不書公年十八以通

經中第及調判入高等授蘇州長洲尉秩滿丁先府君憂

既禫又丁先太夫人憂泣血六年哀毀過禮以方寸再亂

殆無宦情既除喪退居不調者累年而親友以大義敦責

不得已而復起選授左武衛騎曹

一作將軍

參軍分司東都屬

安祿山陷覆洛京以僞職淫刑脅刳士庶公與同官范陽

盧異潛遁於陸渾山食木實飲泉水者二年訖不爲逆命

所汙及肅宗嗣位詔河南尹薛伯連搜訪不仕賊庭隱藏

山谷者伯連得六人以應詔而公與異在焉繇是名節聞

於朝野君子以爲知道優詔褒美特授密縣主簿未周歲

遷宋州碭山縣令時睢陽當大兵後野無草里無人公撫

之一年襁負至二年汙萊闢三年衣食足及解印去縣民

相率泣而餞之君子以爲知政嶺南節度觀察使李勉偉人也旣高公陸渾之節又美公碭山之政欲以名職禮命起而大之遂奏授試大理評事充觀察推官及除書簡牒到門即公捐館舍之明日也才如是命如是嗚呼哀哉公常自負其才不後於人自疑其命不偶於世及將去碭山而反伊川也頓駕擗管沈嘆久之因賦詠懷詩云論成方辨命賦罷即歸田竟如是言終於衡茅之下君子以爲知命公有三子曰平仲平叔平季夫人陸氏即國子司業集賢殿學士善經之女賢明有法度初公旣歿諸子尚幼夫

人勤求衣食親執詩書諷而導之咸爲令子又常以公遺志擇其子而付之故平叔卒能振才業致名位追爵命揭碑表繼父志揚祖德此誠孝子順孫之道也亦由夫人慈善教誘之德浸漬而成就之不其然乎居易常辱與戶部遊而知其家事故見託撰述庶傳信焉銘曰

猗嗟碭山以文行保家聲以義節振時名以惠政撫縣民而職不登諸侯卿秩不及廷尉評悲哉猗嗟碭山前有和州名德如彼後有戶部才位若此才子之父名父之子賢者兼之可謂具美休哉

大唐泗洲開元寺臨壇律德徐泗濠三州僧正明

遠大師塔碑銘

并序

婆娑世界中有釋迦如來出爲上首如來滅後像法中或
羅漢僧或菩薩僧在在處處出爲上首佛道未喪閒生其
人故泗洲開元寺臨壇律德大師實一方上首也大師譙
郡鄆人世姓暴氏僧號明遠七歲依本郡需禪師出家十
九從泗洲靈穆律師受具戒五夏通四分律俱舍論乃升
講座乃登戒壇元和元年衆請充當寺上座明年官補爲
本州僧正統十二部開元寺北地二百步作講堂七間僧

院六所又淮泗間地卑多雨潦歲有水害師與郡守蘇遇等謀於沙湖西隙地創避水僧坊建門廊廳堂厨廩二百間植松杉楠檉檜一萬本由是僧與民無墊溺患旋屬災焚本寺寺藏像滅僧潰者數年師與徐州節度使王侍中有緣遂合願叶力再造寺宇乃請師爲三郡僧正奏乞連置戒壇因其施利廓其規度侍中又以家財萬計助而成之自殿閣堂亭廊庖廩藏泊僧徒藏獲傭保馬牛之舍凡二千若干百十間其中像設之儀器用之具一無闕者長慶五年春作太和元年秋成輪奐莊嚴星環棊布如自地

踊若從天降供施無虛日鐘梵有常聲四衆知歸萬人改
觀於是增上慢者起敬種善根者發心利喜饒益巨能具
舉若非大師於福智僧中而得第一若非侍中於敬修人
中亦爲第一則安能作大佛事而中興像教者乎故如來
所謂我滅後我法傳授於弟子囑於大臣斯言信矣師以
太和八年十二月十九日齋時終於本寺本院是月二十
九日道俗衆萬輩恭敬悲泣備涅槃威儀遷全身歸於湖
西塋塔遵本教而奉先志也報年七十僧臘五十有一始
出家訖於遷化志業行願道力化緣引而伸之隨日廣大

前後臨戒壇者八登律座者十有五僧尼得度者三萬衆
江淮行化者四十年或疑是人如來所使羅漢菩薩吾焉
知之初大師以功德爲心旣成而化侍中以譔錄見託未
就而薨今按弟子僧元亮素行狀序而銘之嗚呼所以滿
大師之願終侍中之志也銘曰

平地踊塔多寶示現險路化城導師方便繫我大師亦有
大願像法是宏塔廟是建佛人交接兩得相見法有毗尼
象有僧尼承教於佛得度於師宣傳戒藏振起律儀四十
餘載勤而行之福德如空不可思議緣合而來功成而去

知性不動色身無住示有遷化非實滅度表塔勒銘門人
戀慕

唐東都奉國寺禪德大師照公塔銘

并序

大師號神照姓張氏蜀州青城人也始出家於智凝法師
受具戒於惠萼律師學心法於惟忠禪師忠一名南印即
第六祖之法曾孫也大師祖達摩宗神會而父事印其教
之大旨以如然不動爲體以妙然不空爲用示真寂而不
說斷滅破計著而不壞假名師旣得之揭以行化出蜀入
洛與俗人有緣用一作月開六壇僅三十載隨根說法言下

多悟由是裂疑網拔惑箭漸離我人相者日日有焉起正
信見本覺頓發菩提心者時時有焉其餘退惡進善隨分
而增上者不可勝紀夫如是可不謂煩惱病中師爲醫王
乎生死海中師爲船師乎嗚呼病未盡而醫去海方涉而
船失粵以開成三年冬十二月示滅於奉國寺禪院以是
月遷葬於龍門山報年六十三僧夏四十四明年傳教主
院上首弟子沙門清閒糾門徒合財施與服勤弟子志行
等營度喪事卜兆於寶應寺荷澤祖師塔東若干步窆而
塔焉示不忘其本也其諸升堂入室得心要口訣者有宗

實在襄復儼在洛道蓋在鎮知遠在徐曰建在晉道光在

潤道威在潞雲眞在慈

一作磁

雲表在汴歸忍在越會幽齊

經在蔡智全景元紹明在秦各於一方分作佛事咸鼓鐘
鳴吼龍象蹴蹋斯皆吾師之教力也不其盛歟眾以余忝
聞法門人結菩提之緣甚熟請於塔石序而銘曰

伊之西北洛之南東法祖法孫歸全於中舊塔會公新塔
照公亦如世禮祔於本宗

唐撫州景雲寺故律大德上宏和尚石塔碑銘

并

序

元和十一年春廬山東林寺僧道深懷縱如建沖契宗一
至柔晉諸智則智明雲皋太易等凡二十輩與白黑衆千
餘人俱實持故景雲大德宏公行狀一通贄錢十萬來詣
潯陽府請司馬白居易作先師碑會有故不果十二年夏
作石墳成復來請會有病不果十三年冬作石塔成又來
請始從之旣而僧反山衆反聚落錢反施者一作寺府翌日而
文就明年而碑立其詞云爾

我聞竺乾古先生出世法法要有三曰戒定慧戒生定定
生慧慧生八萬四千法門是三者迭爲用若次第言則定

爲慧因戒爲定根定根植則苗茂慧因樹則果滿無因求
滿猶夢果也無根求茂猶握苗也雖佛以一切種智攝三
界必先用戒菩薩以六波羅蜜化四生不能捨律律之用
可思量不可思量如來十弟子中稱優波離善持律波離
滅有南山大師得之南山滅有景雲大師得之師諱上宏
姓饒氏曾祖君雅祖公悅父和一作知恭臨川南城人童而
有知故生十五歲發出家心始從舅氏剃落壯而有立故
生二十五一作二歲立菩提願從南嶽大圓大師受具戒樂
其所由生故大厯中不去父母之邦請隸於本州景雲寺

修道應無所住故貞元初離我所徙居洪州龍興寺說法
親近善知識故與匡山法真天台靈裕荆門法裔暨興果
神湊建昌惠進五長老交遊佛法屬王臣故與姜相國公
輔顏太師真卿暨本道廉使楊君憑韋君丹四君子友善
提振禁戒故講四分律而從善遠罪者無其數隨順化緣
故坐甘露壇而誓眾主盟者二十年荷擔大事故前後登
方等施尸羅者十有八會救拔羣生故婆娑男女由我得
度者萬五千七十二人示生無常故元和十年己亥遷化
於東林精舍示滅有所故是月丙寅歸於南岡石墳住世

七十七歲安居六十五夏自生至滅隨迹示教行止語默
無非佛事夫施於人也博則反諸已也厚故門人鄉人報
如不及繇是藝松成林琢石爲塔塔有碑碑有銘銘曰
佛滅度後薈蔔香衰醍醐味醜誰反是香誰復是味景雲
大師景雲之生一匡苾芻中興毗尼景雲之滅衆將安仰
法將疇依昔景雲來行道者隨踐迹者歸今景雲去升堂
者思入室者悲鑪峯之西虎谿之南石塔巍巍有記事者
以真實辭書於塔碑

唐江州興果寺律大德湊公塔碣銘

并序

如來滅後後五百歲有持戒見性者曰興果禪師師姓成
號神湊京兆藍田人既出家具戒於南嶽希操大師參禪
於鍾陵大寂大師志在首楞嚴經行在四分毗尼藏其他
典論以有餘力通大厯八年制懸經論律三科策試天下
僧師中等得度詔配江州興果寺後從僧望移隸東林寺
即雁門遠大師舊道場有甘露壇白蓮池在焉師既居是
寺興佛事元和十二年九月七日遭疾二十六日反真十
月十九日遷全身於寺道北祔雁門墳左春秋七十四夏
臘五十一至乎哉師本行也以精進心脂不退輪以勇健

力過無畏鼓故登壇進律鬱爲法將者垂三十年領羯磨
會十三化大衆萬數儀範所攝惠用所誘貴高憎慢罔不
降伏其威重如自興果起東林一孟齋一榻居衣麻寢
管如坐漆室一作七寶繇是名聞檀施來無虛月盡歸寺藏與

大衆共之迨啟手足目

一作日

前無長物其簡儉如是師心

行禪身持律起居動息皆有常節雖沍寒隆暑風雨黑夜
捧一鑪秉一燭行道禮佛者四十五年凡十二時未嘗闕
一其精勤如是師旣疾亟四大將壞無戀著念無厭離想
郡太守門弟子進醫饋藥者數四師頷之云報身非病焉

用是爲言訖趺坐恬然就化其了悟如是門人道建利辨
元審元惣等封墳建塔思有以識之以先師嘗辱與予游
託爲銘碣初予與師相遇如他生舊識一見欣合不知其
然及遷化時予又題四句詩爲別蓋欲會前心集後緣也
不能改作因取爲銘曰

本結菩提香火社共嫌煩惱電泡身不須戀戀從師去先
請西方作主人

欽定全唐文卷六百七十九目錄

白居易 二十四

唐故會王墓誌銘

并序

故滁州刺史贈刑部尚書滎陽鄭公墓誌銘

并序

唐揚州倉曹參軍王府君墓誌銘

并序

唐太原白氏之殤墓誌銘

并序

醉吟先生墓誌銘

并序

唐銀青光祿大夫太子少保安定皇甫公墓誌銘

并序

唐故銀青光祿大夫秘書監曲江縣開國伯贈禮

部尚書范陽張公墓誌銘

并序

唐故武昌軍節度處置等使正議大夫檢校戶部

尚書鄂州刺史兼御史大夫賜紫金魚袋贈尚

書右僕射河南元公墓誌銘

并序

唐故虢州刺史贈禮部尚書崔公墓誌銘

并序

欽定全唐文卷六百七十九

白居易 二十四

唐故會王墓誌銘

并序

唐元和五年冬十一月四日會王寢疾薨於內邸大小斂之日上皆不舉樂不坐朝恩也越十二月十八日詔京兆尹王播監視葬事寔於萬年縣崇道鄉西趙原禮也是日又詔翰林學士白居易爲之銘誌故事也王諱纁字某德宗之孫順宗之子陛下之弟幼有令德早承寵章未冠而王受封於會夫以祖功宗德之慶父天兄日之貴胄土列

藩之寵好德樂善之賢宜乎壽考福延爲王室輔嗚呼降
年不永二十一而終哀哉皇帝厚惇睦之恩深友悌之愛
故王之薨也軫悼之念有加於常情王之葬也遣奠之儀
有加於常數哀榮兼備斯其謂乎銘曰

歲在寅月窮紀萬年縣崇道里會王薨葬於此

故滁州刺史贈刑部尚書榮陽鄭公墓誌銘

并序

周宣王封母弟桓公於鄭厥後因封命氏爲榮陽人鄭自
桓公而下平簡公而上世家婚嗣咸詳於史牒故不書公
諱某字某五代祖諱某北齊尚書令是爲平簡公曾祖諱

某下邳郡太守王父諱某衛州刺史王考諱某秘書郎贈鄭州刺史公即秘書第三子好學攻詞賦進士中第判入高等始授鄆城尉無何本郡守移他鄉州民有暴悖者相率遮道麾訶不去公忿其犯上立斃六七人採訪使奇之奏署支使改浚儀主簿轉大理評事兼佐漕務彭果領五府奏公爲節度判官會果坐賊連累僚佐貶光化尉移向城尉歷北海時安祿山始亂傳檄郡邑邑民孫俊鄧犀伽毆市人刼廩藏以應公時已去秩因奮呼率僚吏子弟急擊之殺俊犀伽盡殲其黨繇是一邑用寧朝廷美之擢授

登州司馬尋轉長史累加朝散大夫入爲太子左贊善大
夫尚書屯田員外郎太子中允出攝淄州刺史俄換萊州
連有善最詔授檢校司勳郎中兼侍御史充青萊登海密
五州租庸使太尉李公光弼鎮徐州奏公爲徐州刺史充
海登沂三州招討使加正議大夫賜紫金魚袋公威惠舊
著比至部而蒼山賊帥李浩與其徒五千來降繇是三郡
底定復入爲衛尉少卿相國王公縉統河南奏公爲副元
帥判官未幾除祕書少監兼滁州刺史本州團練使居八
載政績大成大厯十二年二月十五日薨於揚州權窆於

某所享年七十有八公凡七佐軍四領郡祿俸不積滯衣
食無常主常嘆曰以飽暖活孀幼以清白貽子孫是吾心
也逮啟手足卒如其志先是太夫人常寢疾公衣不解髮
不櫛者彌年侍疾執喪憂毀過禮公尤善五言詩與王昌
齡王之渙崔國輔輩聯唱迭和名動一時逮今著樂詞播
人口非一晚賦思舊遊詩百篇亦傳於代前夫人清河崔
氏贈清河郡太君後夫人博陵崔氏贈博陵郡君生子七
人女七人長子雲逵有才名官至刑部侍郎京兆尹公由
京兆累贈至散騎常侍刑部尚書次子微終潤州司馬次

子公遠有至行初公年高就養不仕及居憂廬墓泣血三年淮南節度使本道黜陟使泉朝賢袁高高參等累以孝悌稱薦嚮名教者慕之今爲侍御史上柱國滄景節度參謀次子方遠衡州司士參軍次子震當陽丞次子文弼幽州參軍次子安遠率府倉曹參軍公自捐館舍殆逾三紀家國多故未克反葬至元和二年月日始遷兆於鄭州新鄭縣某原祔先秘書塋二夫人從焉時京兆已即世諸弟在下位獨侍御史銜恤襄事孝備始終見託述謨銘於墓

石銘曰

世祿德門斯謂之可久懿文茂績斯謂之不朽二千石之祿七十八之年斯謂之貴壽內史之顯揚柱史之孝行斯謂之有後嗚呼鄭公榮如是哀如是又何不足之有

唐揚州倉曹參軍王府君墓誌銘

代裴頤舍人作

公諱某字士寬其先出自周靈王太子晉凡二十一代而生翦翦爲秦將軍又三世而生珣珣居太原故今爲太原人又十九代而生瓊瓊爲後魏僕射諡孝簡公又二代而生曾祖諱滿官爲河南府王屋縣令王父諱大璉爲嘉州司馬父諱昇爲京兆府咸陽令河南府伊闕令有文行學

術應制舉對沈謀秘畧策登科詩入正聲集公即伊闕第
三子好學善屬文天寶中應明經舉及第選授婺州義烏
縣尉以清幹稱刺史韋之晉知之署本州防禦判官無何
租庸轉運使元載又知之假本州司倉專掌運務歲終課
績居多遂奏聞真授永泰中勅遷越府戶曹屬邑有不理
者公假領之所至必理大厯中本道觀察使薛兼訓以公
清白尤異表奏之有詔權知餘姚縣令時海寇初殄邑焚
田荒公乃營邑室創器用復流庸闢畱畬凡江南列邑之
政公冠其首其制邑闢田增戶之績則會稽之牒地官之

籍載焉建中初選授揚州倉曹參軍至五年七月二十六日疾歿於江都縣之私第春秋六十二夫人清河崔氏鳳閣舍人融之姪孫鄭州司戶法昂之女婦順母訓中外師之貞元二十年十一月十三日疾終於三原縣之官舍享年六十二有子曰播曰炎曰起咸以進士舉及第播應制舉對直言極諫策授集賢殿校書郎累遷監察殿中侍御史三原令炎既第未仕起應博學宏詞科選授集賢殿校書郎昆弟三人不十年而五登甲第時論者榮之一女適范陽盧仲通播等號護靈輿以求貞元年十月二十五日

遷祔於京兆府富平縣淳化鄉之某原從吉兆也嗚呼夫
懋言行蓄事業俾道積於躬者在人也踐大官贊元化俾
功加於民者由命也有其人無其命雖聖與賢無可奈何
維公受天地之和積爲行發爲文宣爲用故在家以孝友
聞行已以清廉聞蒞事以幹蠱聞如金玉在珮動而有聲
其大者又常以經德秉哲致君濟人爲已任有識者深知
之宜乎作王者心膂耳目之官以經緯其邦家而才爲時
生道爲命屈名雖聞於天子位不過於陪臣鬱鬱然歿而
不展其用者命矣夫古人云有明德大智者若不當世其

後必有餘慶今其將在後嗣乎不然何乃德行政事文學之具美聚乎公之三子乎天其或者殆將肥王氏之家大王氏之門以甚明報施之道者也某不佞頃對策於王廷也與炎同升諸科焉祇命於憲府也與播聯執其簡焉及爲考文之官也又起在選中焉辱與公之三子游而聆公之遺風甚熟故作斯文無隱情無愧辭焉銘曰

緱山道光淮水靈長繩繩子孫代有賢良將軍輔秦武功抑揚孝簡翊魏文德閭彰降及於公實生於唐大智全才應用無方作掾於郡三語有章承乏於邑一同載康展如

之人何用不臧宜登大位俾紹前芳嗚呼百鍊之金不鑄
千將十圍之材不作棟梁公亦如之與世不當道不虛行
後嗣其昌

唐太原白氏之殤墓誌銘

并序

白氏下殤曰幼美小字金剛奴其先太原人高祖諱志善
尚衣奉御曾祖諱溫都官郎中王父諱鯨河南府鞏縣令
先府君諱季庚大理少卿山東別駕先太夫人潁川陳氏
封潁川縣君幼美即第四子也旣生而惠旣孩而敏七歲
能誦詩賦八歲能讀書鼓琴九歲不幸遇疾夭徐州符離

縣私第貞元八年九月權窆於縣南原元和九年春二月二十五日改葬於華州下邽縣義津鄉北岡祔於先府君宅兆之東三十步其兄居易行簡藐然已孤撫哀臨穴斷手足之痛其心如初且號且銘誌於墓曰

嗚呼剛奴痛矣哉念爾九歲逝不迴埋魂閔骨長夜臺二十年後復一開昔葬符離今下邽魂兮魂兮隨骨來

醉吟先生墓誌銘

并序

先生姓白名居易字樂天其先太原人也秦將武安君起之後高祖諱志善尚衣奉御曾祖諱溫檢校都官郎中王

父諱鏗侍御史河南府鞏縣令先大父諱季庚朝奉大夫
襄州別駕大理少卿累贈刑部尚書右僕射先大父夫人
陳氏贈潁川郡太夫人妻楊氏宏農郡君兄幼文皇浮梁
縣主簿弟行簡皇尚書膳部郎中一女適監察御史談宏
謩三姪長曰味道廬州巢縣丞次曰景回淄州司兵參軍
次曰晦之舉進士樂天無子以姪孫阿新爲之後樂天幼
好學長工文累進士拔萃制策三科始自校書郎終以少
傅致仕前後歷官二十任食祿四十年外以儒行修其身
中以釋教治其心旁以山水風月歌詩琴酒樂其志前後

著文集七十卷合三千七百二十首傳於家又著事類集
要三十部合一千一百三十門時人目爲白氏六帖行於
世凡平生所慕所感所得所喪所經所逼所通一事一物
已上布在文集中開卷而盡可知也故不備書大厯六年
正月二十日生於鄭州新鄭縣東郭宅以會昌六年月日
終於東都履道里私第春秋七十有五以某年月日葬於
華州下邽縣臨津里北原祔侍御僕射二先塋也啟手足
之夕語其妻與姪曰吾之幸也壽過七十官至二品有名
於世無益於人褒優之禮宜自貶損我歿當斂以衣一襲

以車一乘無用鹵薄葬無以血食祭無請太常諡無建神道碑但於墓前立一石刻吾醉吟先生傳一本可矣語訖命筆自銘其墓云

樂天樂天生天地中七十有五年其生也浮雲然其死也委蛻然來何因去何緣吾性不動吾行屢遷已焉已焉吾安往而不可又何足厭戀乎其間

唐銀青光祿大夫太子少保安定皇甫公墓誌銘

并序

公姓皇甫諱鏞字穌卿始封祖微子也周克殷封於宋九

代至戴公戴公之子曰皇父因字命族爲皇父氏至秦徙茂林改父爲甫及漢遷安定朝那其後爲朝那人五代祖珍義資建二州刺史曾祖文房高陵令祖鄰幾賜汝州刺史考愉累贈尚書左僕射太子太保妣洛陽賈氏贈姑臧郡太夫人公由進士出身補夏陽主簿試左武衛兵曹充宣歙觀察推官轉大理評事詔徵授監察御史改秘書郎殿中侍御史內供奉始賜朱紱銀印充鳳翔節度判官營田副使旋又徵還眞拜殿中改比部員外郎河南令都官郎中河南少尹歷太子左右庶子并分司東都俄又徵拜

國子祭酒未幾謝疾改太子賓客轉秘書監分司又就拜
檢校左散騎常侍兼太子賓客轉秘書監分司始加命服
正三品又遷太子少保分司封安定縣開國男食邑三百
戶始立家廟享三世公先娶博陵崔氏後娶范陽盧氏二
夫人皆有淑德先公而歿有二子曰璵曰珣一女適太原
王諲以開成元年七月十日寢疾薨於東都宣教里第享
年七十七皇帝廢朝一日是歲十月三日用大葬之禮歸
全於河陰縣廣武原從太保府君先塋以盧夫人合祔焉
公自將仕郎累階至銀青光祿大夫自武騎尉累勲至上

介之勢不能及及仲之失寵得罪也從而緣坐者有之公獨皦然雖骨肉之親不能累識者心伏號爲偉人公好學善屬文尤工五言七言詩有集十八卷又著性言十四篇居易辱與公游迨二紀矣自左右庶子歷賓客訖於少保傳皆同官東朝分務東周在寮友間聞之最熟故得以實錄誌而銘曰

賢哉少保令聞令儀金璧其操鸞鳳其姿德如斯壽如斯位如斯嗚呼人爵天爵實兼有之廣武之原大河之湄龜告筮從吉土良時封於茲樹於茲嗚呼少保之墓百代可

知

唐故銀青光祿大夫秘書監曲江縣開國伯贈禮

部尚書范陽張公墓誌銘

并序

公諱仲方字靖之其先范陽人晉司空茂先之後永嘉南
遷始徙居於韶之曲江縣後嗣因家焉唐朝贈太常卿諱
宏愈公之曾祖也嶺南節度使廣州刺史殿中監諱九臯
公之王父也贈尚書右僕射諱抗公之皇考也贈潁川郡
太夫人陳氏公之皇妣也都昌令仲端以下四人公之兄
也監察御史仲孚以下二人公之弟也博陵郡夫人崔氏

公之夫人也右清道率府胄曹景宣進士茂元明經智周公之子也監察御史裏行楊澥校書郎陸賓虞公之壻也公即僕射府君第五子貞元中進士舉及第博學選登科初補集賢院校書郎丁內憂喪除復補正字選授咸陽縣尉鄜坊節度使辟爲判官奏授監察御史裏行俄而真拜歷殿中轉侍御史倉部員外郎金州刺史度支郎中駁宰相事議出爲遂州司馬移復州司馬俄遷刺史改曹州刺史河南少尹鄭州刺史入爲諫議大夫福建觀察使兼御史中丞徵還爲太子賓客再爲左散騎常侍京兆尹華州

刺史兼御史大夫秘書監勲至上柱國階至銀青光祿大夫封至曲江縣開國伯食邑七百戶開成二年四月某日薨於上都新昌里第詔贈禮部尚書以某年八月某日歸葬於河南府某縣某鄉某原祔僕射府君之封域焉公幼好學長善屬文俯取科第如拾地芥著文集三十卷藏於家纂制詔一百卷行於代尤工五言章句詩家流稱之嘗謨先僕射府君神道碑及丞相文獻始興公廟碑由文得禮秉筆者許之文獻始興公九齡即公之伯祖開元中以儒學詩賦獨步一時及輔弼明皇帝號爲賢相餘慶濟美

宜在於公公沿其業襲其文而不嗣其位惜哉矧公爲人
溫良沖淡恬然有君子德立朝直清貞諒肅然有正人風
在官寬重易簡綽然有長吏體爲子弟孝敬爲伯父慈和
與朋友信寵辱不驚其心喜愠不形於色入仕四十載歷
官二十五享年七十二才如是祿如是壽如是宜哉居易
與公少同官老同游結交慕德久而彌篤故景宣等以論
譔先德見託爲文式序且銘勒於墓石銘曰

在唐張氏世爲儒宗文獻旣歿鬱生我公我公泐泐學奧
詞雄緣情體物有文獻風慶襲於家道積厥躬駿足逸翮

天驥冥鴻始自筮仕迄於達官六刺藩部再珥貂蟬大諫
選重尹京才難竇於望苑寵在蓬山凡所踐歷皆有可觀
終然允臧已矣歸全嗚呼洛郊北阡邛阜西原佳城一閉
陵谷推遷所不泯者令名藹然

唐故武昌軍節度處置等使正議大夫檢校戶部
尚書鄂州刺史兼御史大夫賜紫金魚袋贈尚
書右僕射河南元公墓誌銘

并序

公諱稹字微之河南人六代祖巖隋兵部尚書封平昌公
五代祖宏隋北平太守高祖義端魏州刺史曾祖延景岐

州參軍祖諱悱南頓縣丞贈兵部員外郎考諱寬比部郎
中舒王府長史贈尚書右僕射妣滎陽鄭氏追封陳畱郡
太夫人公即僕射府君第四子後魏昭成皇帝十五代孫
也公受天地粹靈生而岐然孩而嶷然九歲能屬文十五
明經及第二十四試判入四等署秘省校書二十八應制
策入三等拜左拾遺即日獻教本書數月間上封事六七
憲宗召對言及時政執政者疑忌出公爲河南尉丁陳畱
太夫人憂哀毀過禮杖不能起服除之明日授監察御史
使於蜀按任敬仲獄得情又劾奏東川帥違詔條過籍稅

又奏平塗山甫等八十八家冤事名動三川三川人慕之
其後多以公姓字名其子朝廷病東諸侯不奉法東御史
府不治事命公分臺而董之時有河南尉離局從軍職尹
不能止監察使死其柩乘傳入郵郵吏不敢詰內園司械
繫人踰年臺府不得知飛龍使匿趙氏亡命奴爲養子主
不敢言浙右帥封杖決安吉令至死子不敢愬凡此數十
事或奏或劾或移歲餘皆舉正之內外權寵臣無奈何咸
不快意會河南尹有不如法事公引故事奏而攝之甚急
先是不快者乘其便相噪嗾坐公專逞作威黜爲江陵士

曹掾居四年徙通州司馬又四年移虢州長史長慶初穆宗嗣位舊聞公名以膳部員外郎徵用既至轉祠部郎中賜緋魚袋知制誥制誥王言也近代相沿多失於巧俗自公下筆俗一變至於雅三變至於典謨時謂得人上嘉之數召與語知其有輔弼才擢授中書舍人賜紫金魚袋翰林學士承旨尋拜工部侍郎旋守本官同中書門下平章事公既得位方將行已志答君知無何有僉人以飛語構同位詔下按驗無狀上知其誣全大體與同位兩罷之出爲同州刺史始至急吏緩民省事節用歲收羨財千萬以

補亡戶逋租其餘因弊制事贍上利下者甚多二年改御史大夫浙東觀察使將去同同之耆幼鰥獨泣戀如別慈父母遮道不可通詔使導呵揮鞭有見血者路闢而後得行先是明州歲進海物其淡蚶非禮之味尤速壞課其程日馳數百里公至越未下車趨奏罷自越抵京師郵夫獲息肩者萬計道路歌舞之明年辨沃瘠察貧富均勞逸以定稅籍越人便之無流庸無逋賦又明年命吏課七郡人各築陂塘春貯雨水夏溉旱苗農人賴之無凶年無餓殍在越八載政成課高上知之就加禮部尚書降璽書慰諭

以示旌寵又以尚書左丞徵還旋改戶部尚書鄂岳節度使在鄂三載其政如越太和五年七月二十二日遇暴疾一日薨於位春秋五十三上聞之軫悼不視朝贈尚書右僕射加賻贈焉前夫人京兆韋氏懿淑有聞無祿早世生一女曰保子適校書郎韋絢今夫人河東裴氏賢明知禮有輔佐君子之勞封河東郡君生三女曰小迎未笄道衛道扶齟齬一子曰道護三歲仲兄司農少卿積姪御史臺主簿某等銜哀襄事裴夫人韋氏長女暨諸孤幼等號護唐嬰以六年七月十二日祔葬於咸陽縣奉賢鄉洪瀆原

從先宅兆也公著文一百卷題爲元氏長慶集又集古今
刑政之書三百卷號類集并行於代公凡爲文無不臻極
尤工詩在翰林時穆宗前後索詩數百篇命左右諷詠宮
中呼爲元才子自六官兩都八方至南蠻東夷國皆寫傳
之每一章一句出無脛而走疾於珠玉又觀其述作編纂
之旨豈止於文章刀筆哉實有心在於安人治國致君堯
舜致身伊臯耳抑天不與耶將人不幸耶予嘗悲公始以
直躬律人勤而行之則坎壈而不偶謫瘴鄉凡十年髮斑
白而來歸次以權道濟世變而通之又齟齬而不安居相

位僅三月席不煖而罷去通介進退卒不獲心是以法理之用止於修一職不布於庶官仁義之澤止於惠一方不周於四海故公之心不足也逢時與不逢時同得位與不得位同富貴與浮雲同何者時行而道未行身遇而心不遇也執友居易獨知其心以泣濡翰書銘於墓曰

嗚呼微之年過知命不謂之夭位兼將相不謂之少然未康吾民未盡吾道在公之心則爲不了嗟哉惜哉道廣而俗隘時矣夫心長而運短命矣夫嗚呼微之已矣夫

唐故虢州刺史贈禮部尚書崔公墓誌銘

并序

唐有通四科達三教者曰惟崔公公諱元亮字晦叔其先
出於炎帝至裔孫穆伯受封於崔因而命氏漢初始分爲
清河博陵二祖故其後稱博陵人曾祖悅洛州司戶參軍
贈太子少保祖光迪贈贊善大夫考抗揚州司馬兼通事
舍人贈太子少師妣太原王氏贈晉陽郡太夫人公即少
師季子解褐補秘書省校書郎從事宣越二府奏授協律
郎大理評事朝廷知其才徵授監察轉殿中厯侍御史膳
部駕部員外郎洛陽令密州刺史公旣至密密民之凍餒
者賑恤之疾疫者救療之胔骼未殯者命葬藏之男女過

時者趨嫁娶之三月而政立二年而化行密人悅之發於
謠詠換歙州刺史其政如密先是歙民畜馬牛而生駒犢
者官書其數吏緣爲姦公旣下車盡焚其籍寧息貿易一
無所問先是歙民居山險而輸稅米者擔負跋涉勤苦不
支公許其計斛納縉賤入貴出官且獲利人皆忘勞農人
便之歸如流水朝廷聞其政徵拜刑部郎中謝病不就俄
改湖州刺史政如密歙加之以聚羨財而代逋租則人不
困謹茶法以防黠吏則人不苦修堤塘以防旱歲則人不
饑罷氓賴之如依父母入爲秘書少監改曹州刺史兼御

史中丞謝病不就拜太常少卿遷諫議大夫屢上封章言
行職舉上召對加金紫以獎之假貂蟬以寵之未幾朝有
大獄人心惴駭勢連中外衆以爲寃百辟在廷無敢言者
公獨進及雷危言觸鱗天威赫然連叱不去遂置笏伏陛
極言是非血淚盈襟詞竟不屈上意稍悟容而聽之卒使
罪疑惟輕實公之力旣而真拜因旌忠臣繇是正氣直聲
震耀朝右搢紳者賀皆曰國有人焉國有人焉公以爲名
不可多取退不必待年決就長告徑遵歸路朝廷不得已
在途拜太子賓客分司東都公濟源有田洛下有宅勸誨

子弟招邀賓朋以山水琴酒自娛有終焉之志無何又除
虢州刺史蓋執政者惜其去將欲馴致而復用之太和七
年七月十一日遇疾薨於虢州廨舍天子廢朝一日贈禮
部尚書周行士林聞者相弔宗族交友靡不出涕遺直遺
愛公兼有焉嗚呼公之將終也遺誠諸子其書大畧云吾
年六十六不爲無壽官至三品不爲不達死生定分何足
過哀自天寶以還山東士人皆改葬兩京利於便近唯吾
一族至今不遷我歿宜歸全於滏陽先塋正首邱之義也
送終之事務從儉薄保家之道無忘孝悌吾玉磬琴畱別

樂天請爲墓誌云爾夫人范陽盧氏先公而歿有子九人
長曰煢通事舍人次曰芻言罕言舉進士次曰緩中牟尉
其下皆幼稚煢等哀毀孝敬號號護轎嬰以九年四月二十
八日用大葬之禮歸窆於磁州昭義縣磁邑鄉北原遷盧
夫人而合祔焉遵理命也公之丁少師憂也退居高郵其
地卑濕泣血卧苦者三載因病痺其兩股焉逮於終身竟
不能趨拜從祖弟仁亮竄謫巴南歿而無後公先命長男
煢護喪歸葬後命幼子聽繼絕承祧自宗族及朋執間有
死無所歸孤無所依者公或葬之祭之或衣之食之或婚

之嫁之侯齊二家之類是也故閨門稱其孝羣從仰其仁
交遊服其義可不謂德行乎公幼嗜學長善屬文以辭賦
舉進士登甲科以書判調天官入上等前後著文集凡若
千卷尤工五言七言詩警策之篇多在人口其餘著述作
者許之可不謂文學乎公之典密歛湖也理化如彼可不
謂政事乎居大諫騎省也忠謹如此可不謂言語乎公夙
慕黃老之術齋心受籙服氣鍊形暑不流汗冬不挾纊膚
體顏色冰清玉溫未識者望之如神仙中人也
在湖三歲
歲修三元道齋輒有彩雲靈鶴迴翔壇上久之而去前後

置齋七八而鶴來儀者凡三百六十其內修外感也如此可不謂通於大道乎公之晚年又師六祖以無相爲心地以不二爲法門每遇僧徒輒論真諦雖耆年宿德皆心伏之及易簀之夕大怖將至如入三昧恬然自安仍於遺疏之末手筆題云甦榮甦悴敲石火即空即色眼生花許時爲客今歸去大厯元年是我家其解空得証也又如此可不謂達於佛性乎總而言之故曰通四科達三教者也居易不佞辱與公游者三十餘年年老分深定爲執友况奉遺札託爲斯文且慚鄙陋不敢辭讓銘曰

湓水之陽鼓山之下吉日吉土載封載樹嗚呼博陵崔君之墓